

六韜


六韜一

文韜

文師

文王將田史編布卜曰田於渭陽將大得焉非  
龍非虬非虎非熊兆得公侯天遺汝師以之佐  
昌施及三王文王曰地致是乎史編曰編之太

明河東趙標校刊





祖史疇爲禹占得臯陶地比於此文王乃齊三日乘田車駕田馬田於滑陽卒見太公坐茅以漁文王勞而問之曰子樂漁邪太公曰君子樂得其志小人樂得其事今吾漁甚有似也文王曰何謂其有似也太公曰釣有三權祿等以權死等以權官等以權夫釣以求得也其情深可以觀大矣文王曰願聞其情太公曰源深而水流水流而魚生之情也根深而木長木長而實

生之情也君子情同而親合親合而事生之情也言語應對者情之飾也言至情者事之極也今臣言至恭不諱君其惡之乎文王曰唯仁人能受正諫不惡至情何爲其然太公曰緡微餌明小魚食之緡調餌香中魚食之緡隆餌豐大魚食之夫魚食其餌乃牽於緡人食其祿乃服於君故以餌取魚魚可殺以祿取人人可竭以家取國國可拔以國取天下天下可畢嗚呼曼



曼繇繇其聚必散嘿嘿昧昧其光必遠微哉聖人之德誘乎獨見樂哉聖人之慮各歸其次而立歛焉文王曰立歛何若而天下歸之太公曰天下非一人之天下乃天下之天下也同天下之利者則得天下擅天下之利者則失天下天有時地有財能與人共之者仁也仁之所在天下歸之免人之死解人之難救人之患濟人之急者德也德之所在天下歸之與人同憂同樂

同好同惡義也義之所在天下赴之凡人惡死而樂生好德而歸利能生利者道也道之所在天下歸之文王再拜曰允哉敢不受天之詔命乎乃載與俱歸立爲師

盈虛

文王問太公曰天下熙熙一盈一虛一治一亂所以然者何也其君賢不肖不等乎其天時變化自然乎太公曰君不肖則國危而民亂君賢



聖則國安而民治禍福在君不在天時王曰古  
之聖賢可得聞乎太公曰昔者帝堯之王天下  
上世所謂賢君也文王曰其治如何太公曰帝  
堯王天下之時金銀珠玉不飾錦繡文綺不衣  
奇恠珍異不視玩好之器不寶淫泆之樂不聽  
宮垣屋室不堊薨桷椽楹不斷茅次偏庭不剪  
鹿裘禦寒布衣掩形糲梁之飯藜藿之羹不以  
役作之故害民耕織之時削心約志從事乎無

爲吏忠正奉法者尊其位廉潔愛人者厚其祿  
民有孝慈者愛敬之盡力農桑者慰勉之旌別  
淑慝表其門閭平心正節以法度禁邪僞所憎  
者有功必賞所愛者有罪必罰存養天下鰥寡  
孤獨振瞻禍亡之家其自奉也甚薄其賦役也  
甚寡故萬民富樂而無饑寒之色百姓戴其君  
如日月親其君如父母文王曰大哉賢德之君  
也



國務

文王問太公曰願聞爲國之大務欲使主尊人安爲之柰何太公曰愛民而已文王曰愛民柰何太公曰利而勿害成而勿敗生而勿殺與而勿奪樂而勿苦喜而勿怒文王曰敢請釋其故太公曰民不失務則利之農不失時則成之薄賦歛則與之儉宮室臺榭則樂之吏清不苛擾則喜之民失其務則害之農失其時則敗之無

罪而罰則殺之重賦歛則奪之多營宮室臺榭以疲民力則苦之吏濁苛擾則怒之故善爲國者馭民如父母之愛子如兄之愛弟見其饑寒則爲之憂見其勞苦則爲之悲賞罰如加於身賦歛如取於已此愛民之道也

大禮

文王問太公曰君臣之禮如何太公曰爲上唯臨爲下唯沉臨而無遠沉而無隱爲上唯周爲



下唯定周則天也定則地也或天或地大禮乃成文王曰主位如何太公曰安徐而靜柔節先定善與而不爭虛心平志待物以王文王曰主聽如何大公曰勿妄而許勿逆而拒許之則失守拒之則閉塞高山仰止不可極也深淵度之不可測也神明之德正靜其極文王曰主明如何大公曰目貴明耳貴聰心貴智以天下之目視則無不見也以天下之耳聽則吾不聞也以

天下之心慮則無不知也輻輳並進則明不蔽矣

明傳

文王寢疾召太公望太子發在側嗚呼天將棄予周之社稷將以屬汝今予欲師至道之言以明傳之子孫太公曰王何所問文王曰先聖之道其所止其所起可得聞乎太公曰見善而怠時至而疑知非而處此三者道之所止也柔而



六韜 卷一  
靜恭而敵強而弱忍而剛此四者道之所起也  
故義勝欲則昌欲勝義則亡敵勝怠則吉怠勝  
敵則滅

### 六守

文王問太公曰君國主民者其所以失之者何  
也太公曰不謹所與也人君有六守三寶文王  
曰六守何也太公曰一曰仁二曰義三曰忠四  
曰信五曰勇六曰謀是謂六守文王曰謹擇六

守者何太公曰富之而觀其無犯貴之而觀其  
無驕付之而觀其無轉使之而觀其無隱危之  
而觀其無恐事之而觀其無窮富之而不犯者  
仁也貴之而不驕者義也付之而不轉者忠也  
使之而不隱者信也危之而不恐者勇也事之  
而不窮者謀也人君無以三寶借人借人則君  
失其威文王曰敢問三寶太公曰大農大工大  
商謂之三寶農一其鄉則穀足工一其鄉則器



足商一其鄉則貨足三寶各安其處民乃不慮  
無亂其鄉無亂其族臣無富於君都無大於國  
六守長則君昌三寶全則國安

守土

文王問太公曰守土柰何太公曰無疏其親無  
怠其衆撫其左右御其四旁無借人國柄借人  
國柄則失其權無掘壑而附丘無舍本而治末  
日中必彗操刀必割執斧必伐日中不彗是謂

失時操刀不割失利之期執斧不伐賊人將來  
涓涓不塞將爲江河熒熒不救炎炎柰何兩葉  
不去將用斧柯是故人君必從事於富不富無  
以爲仁不施無以合親疏其親則害矣其衆則  
敗無借人利器借人利器則爲人所害而不終  
其世文王曰何謂仁義太公曰敬其衆合其親  
敬其衆則和合其親則喜是謂仁義之紀無使  
人奪汝威因其明順其常順者任之以德逆者



六韜 卷一  
絕之以力敬之勿疑天下和服

守國

文王問太公曰守國柰何太公曰齊將語君天地之經四時所生仁聖之道民機之情王齊七日北面再拜而問之太公曰天生四時地生萬物天下有民聖人牧之故春道生萬物榮夏道長萬物成秋道斂萬物盈冬道藏萬物靜盈則藏藏則復起莫知所終莫知所始聖人配之以

爲天地經紀故天下治仁聖藏天下亂仁聖昌至道其然也聖人之在天地間也其實固大矣因其常而視之則民安夫民動而爲機機動而得失爭矣故發之以其陰會之以其陽爲之先唱而天下和之極反其常莫進而爭莫退而遜守國如此與天地同光

上賢

文王問太公曰王人者何上何下何取何去何



六韜 卷一 九  
禁何止太公曰上賢下不肖取誠信去詐偽禁  
暴亂止奢侈故王人者有六賊七害文王曰願  
聞其道太公曰夫六賊者一曰臣有大作宮室  
池榭遊觀倡樂者傷王之德二曰民有不事農  
桑任氣游俠犯厯法禁不從吏教者傷王之化  
三曰臣有結朋黨蔽賢智障主明者傷王之權  
四曰士有抗志高節以爲氣勢外交諸侯不重  
其主者傷王之威五曰臣有輕爵位賤有司羞

爲上犯難者傷功臣之勞六曰強宗侵奪凌侮  
貧弱傷庶人之業七害者一曰無智畧權謀而  
重賞尊爵之故強勇輕戰僥倖於外王者謹勿  
使爲將二曰有名無實出入異言掩善揚惡進  
退爲巧王者謹勿與謀三曰朴其身躬惡其衣  
服語無爲以求名言無欲以求利此僞人也王  
者謹勿近四曰竒其冠帶偉其衣服博聞辯辭  
虛論高議以爲容美窮居靜處而誹時俗此姦



人也王者謹勿寵五曰讒佞苟得以求官爵果  
敢輕死以貪祿秩不圖大事貪利而動以高談  
虛論說於人主王者謹勿使六曰爲雕文刻鏤  
技巧華飾而傷農事王者必禁七曰僞方異技  
巫蠱左道不祥之言幻惑良民王者必止之故  
民不盡力非吾民也士不誠信非吾士也臣不  
忠諫非吾臣也吏不平潔愛人非吾吏也相不  
能富國強兵調和陰陽以安萬乘之主正群臣  
定名實明賞罰樂萬民非吾相也夫王者之道  
如龍首高居遠望深視而審聽示其形隱其情  
若天之高不可極也若淵之深不可測也故可  
怒而不怒姦臣乃作可殺而不殺大賊乃發兵  
勢不行敵國乃強文王曰善哉

### 舉賢

文王問太公曰君務舉賢而不能獲其功世亂  
愈甚以至危亡者何也太公曰舉賢而不用是



有舉賢之名而無用賢之實也文王曰其失安在太公曰其失在君好用世俗之所譽而不得賢也文王曰何如太公曰君以世俗之所譽者爲賢以世俗之所毀者爲不肖則多黨者進少黨者退若是則群邪比周而蔽賢忠臣死於無罪姦臣以虛譽取爵位是以世亂愈甚則國不免於危亡文王曰舉賢柰何太公曰將相分職而各以官名舉人按名督實選才考能令實當其名名當其實則得舉賢之道也

### 賞罰

文王問太公曰賞所以存勸罰所以示懲吾欲賞一以勸百罰一以懲衆爲之柰何太公曰凡用賞者貴信用罰者貴必賞信罰必於耳目之所聞見則所不聞見者莫不陰化矣夫誠暢於天地通於神明而况於人乎

### 兵道



武王問太公曰兵道何如太公曰凡兵之道莫過乎一一者能獨往獨來一者階於道幾於神用之在於機顯之在於勢成之在於君故聖王號兵爲凶器不得已而用之今商王知存而不知亡知樂而不知殃夫存者非存在於慮亡樂者非樂在於慮殃今王已慮其源豈憂其流乎武王曰兩軍相遇彼不可來此不可往各設固備未敢先發我欲襲之不得其利爲之柰何太

公曰外亂而內整示饑而實飽內精而外鈍一合一離一聚一散陰其謀密其機高其壘伏其銳士寂若無聲敵不知我所備欲其西襲其東武王曰敵知我情通我謀爲之柰何太公曰兵勝之術密察敵人之機而速乘其利復疾擊其不意



六韜

卷一

六韜卷一終

國家圖書館, NATIONAL CENTRAL LIBRARY, TAIWAN, R.O.C



六韜

六韜二

武韜

發啓

明河東趙

文王在鄴召太公曰嗚呼商王虐極罪殺不辜  
公尚助予憂民如何太公曰王其脩德以下賢  
惠民以觀天道天道無殃不可先倡人道無災



不可先謀必見天殃又見人災乃可以謀必見其陽又見其陰乃知其心必見其外又見其內乃知其意必見其疏又見其親乃知其情行其道道可致也從其門門可入也立其禮禮可成也爭其強強可勝也全勝不鬪太兵無創與鬼神通微哉微哉與人同病相救同情相成同惡相助同好相趨故無甲兵而勝無衝機而攻無溝塹而守大智不智大謀不謀大勇不勇大利

不利利天下者天下啓之害天下者天下閉之天下者非一人之天下乃天下之天下也取天下者若逐野獸而天下皆有分肉之心若同舟而濟濟則皆同其利敗則皆同其害然則皆有以啓之無有閉之也無取於民者取民者也無取民者民利之無取國者國利之無取天下者天下利之故道在不可見事在不可聞勝在不可知微哉微哉鷲鳥將擊卑飛歛翼猛獸將搏



彌耳俯伏聖人將動必有愚色今彼有商衆口  
相惑紛紛渺渺好色無極此亡國之證也吾觀  
其野草管勝穀吾觀其衆邪曲勝直吾觀其吏  
暴虐殘賊敗法亂刑上下不覺此亡國之時也  
大明發而萬物皆照大義發而萬物皆利大兵  
發而萬物皆服大哉聖人之德獨聞獨見樂哉

文啓

文王問太公曰聖人何守太公曰何憂何嗇萬

物皆得何嗇何憂萬物皆道政之所施莫知其  
化時之所在莫知其移聖人守此而萬物化何  
窮之有終而復始優而游之展轉求之求而得  
之不可不藏既以藏之不可不行既以行之勿  
復明之夫天地不自明故能長生聖人不自明  
故能名彰古之聖人聚人而爲家聚家而爲國  
聚國而爲天下分封賢人以爲萬國命之曰大  
紀陳其政教順其民俗群曲化直變於形容萬



國不通各樂其所人愛其上命之曰大定嗚呼  
聖人務靜之賢人務正之愚人不能正故與人  
爭上勞則刑繁刑繁則民憂民憂則流亡上下  
不安其生累世不休命之曰大失天下之人如  
流水障之則止啓之則行靜之則清嗚呼神哉  
聖人見其始則知其終文王曰靜之柰何太公  
曰天有常形民有常生與天下共其生而天下  
靜矣太上因之其次化之夫民化而從政是以

天無爲而成事民無與而自富此聖人之德也  
文王曰公言乃協予懷夙夜念之不忘以用爲  
常

文伐

文王問太公曰文伐之法柰何太公曰凡文伐  
有十二節一曰因其所喜以順其志彼將生驕  
必有好事苟能因之必能去之二曰親其所愛  
以分其威一人兩心其中必衰廷無忠臣社稷



必危三曰陰賂左右得情甚深身內情外國將  
生害四曰輔其淫樂以廣其志厚賂珠玉娛以  
美人卑辭委聽順命而合彼將不爭姦節乃定  
五曰嚴其忠臣而薄其賂稽留其使勿聽其事  
亟爲置代遺以誠事親而信之其君將復合之  
苟能嚴之國乃可謀六曰收其內間其外才臣  
外相敵國內侵國鮮不亡七曰欲錮其心必厚  
賂之收其左右忠愛陰示以利令之輕業而蓄

積守虛八曰賂以重寶因與之謀謀而利之則  
之必信是謂重親重親之積必爲我用有國而  
外其地必敗九曰尊之以名無難其身示以大  
勢從之必信致其大尊先爲之榮微飾聖人國  
乃太偷十曰下之必信以得其情承意應事如  
與同生既以得之乃微收之時及將至若天喪  
之十一曰塞之以道人臣無不重貴與富惡危  
與咎陰示大尊而微輸重寶收其豪傑內積其



厚而外爲之陰內智士使圖其計內勇士使高其氣富貴甚足而常有繁滋徒黨已具是謂塞之有國而塞安能有國十二曰養其亂臣以迷之進美女淫聲以惑之遺良犬馬以勞之時與大勢以誘之上察而與天下圖之十二節備乃成武事所謂上察天下察地徵已見乃伐之

順啓

文王問太公曰何如而可爲天下太公曰大蓋

天下然後能容天下信蓋天下然後能約天下仁蓋天下然後能懷天下恩蓋天下然後能保天下權蓋天下然後能不失天下事而不疑則天運不能移時變不能遷此六者備然後可以爲天下政故利天下者天下啓之害天下者天下閉之生天下者天下德之殺天下者天下賊之徹天下者天下通之窮天下者天下仇之安天下者天下恃之危天下者天下灾之天下者



非一人之天下唯有道者處之

三疑

武王問太公曰予欲立功有三疑恐力不能攻強離親散衆爲之柰何太公曰因之慎謀用財夫攻強必養之使強益之使張太強必折太張必缺攻強以強離親以親散衆以衆凡謀之道周密爲寶設之以事玩之以利爭心必起欲離其親因其所愛與其寵人與之所欲示之所利

因以疏之無使得志彼貪利甚喜遺疑乃止凡攻之道必先塞其明而後攻其強毀其大除民之害淫之以色留之以利養之以味娛之以樂既離其親必使遠民勿使知謀扶而納之莫覺其意然後可成惠施於民必無愛財民如牛馬貴飲食之從而愛之心以啓智智以啓財財以啓衆衆以啓賢賢之有啓以王天下



六韜

卷二

六韜卷之二終

國家圖書館, NATIONAL CENTRAL LIBRARY, TAIWAN, R.O.C.





六韜

六韜三

龍韜

三翼

武王問太公曰王者帥師必有股肱羽翼以成  
威神爲之柰何太公曰凡舉兵師以將爲命命  
在通達不守一術因能授職各取所長隨時變

明河東趙標校刊

國家圖書館 NATIONAL CENTRAL LIBRARY, TAIWAN, R.O.C.





化以爲綱紀故將有股肱羽翼七十二人以應  
天道備數如法審知命理殊能異技萬事畢矣  
武王曰請問其目太公曰腹心一人主贊謀應  
卒揆天消變總覽計謀保全民命謀士五人主  
圖安危慮未萌論行能明賞罰受官位決嫌疑  
定可否天文三人主司星曆候風氣推時日考  
符驗校災異知天心去就之機地利三人主三  
軍行止形勢利害消息遠近險易水涸山阻不

失地利兵法九人主講論異同行事成敗簡練  
兵器刺舉非法通糧四人主度飲食備蓄積通  
糧道致五穀命三軍不困乏奮威四人主擇才  
力論兵革風馳電掣不知所由伏旗鼓三人主  
伏旗鼓明耳目詭符印謬號令闇忽往來出入  
若神股肱四人主任重持難脩溝塹治壁壘以  
備守禦通才二人主拾遺補過應偶賓客論議  
談語消患解結權士三人主行奇譎設殊異非



人所識行無窮之變耳目七人主往來聽言視  
變覽四方之事軍中之情爪牙五人主揚威武  
激勵三軍使冒難攻銳無所疑慮羽翼四人主  
揚名譽震遠方動四境以弱敵心遊士八人主  
伺姦候變開闔人情觀敵之意以爲間諜術士  
二人主爲譎詐依托鬼神以惑衆心方士三人  
主百藥以治金瘡以痊萬病法筭二人主計會  
三軍營壘糧食財用出入

### 論將

武王問太公曰論將之道柰何太公曰將有五  
材十過武王曰敢問其目太公曰所謂五材者  
勇智仁信忠也勇則不可犯智則不可亂仁則  
愛人信則不欺忠則無二心所謂十過者有勇  
而輕死者有急而心速者有貪而好利者有仁  
而不忍人者有智而怯者有信而喜任人者有  
廉潔而不愛人者有智而心緩者有剛毅而自



用者有懦而喜任人者勇而輕死者可暴也急而心速者可久也貪而好利者可貴也仁而不忍人者可勞也智而心怯者可窘也信而喜信人者可誑也廉潔而不愛人者可侮也智而心緩者可襲也剛毅而自用者可事也懦而喜任人者可欺也故兵者國之大事存亡之道命在於將將者國之輔先王之所重也故置將不可不察也故曰兵不兩勝亦不兩敗兵出踰境不

出十日不有亡國必有破軍殺將武王曰善哉

### 選將

武王問太公曰王者舉兵簡練英雄知士之高下爲之柰何太公曰夫士外貌不與中情相應者十五有賢而不肖者有溫良而爲盜者有貌恭敬而心慢者有外廉謹而內無恭敬者有精精而無情者有湛湛而無誠者有存謀而無決者有如果敢而不能者有恇恇而不信者有恍



恍惚而反忠實者有詭激而有功效者有外  
勇而內怯者有肅肅而反易人者有嗃嗃而反  
靜慤者有勢虛形劣而出外無所不至無使不  
遂者天下所賤聖人所貴凡人不知非有大明  
不見其際此士之外貌不與中情相應者也武  
王曰何以知之太公曰知之有八證一曰問之  
以言以觀其詳二曰窮之以辭以觀其變三曰  
與之間謀以觀其誠四曰明白顯問以觀其德

五曰使之以財以觀其廉六曰試之以色以觀  
其貞七曰告之以難以觀其勇八曰醉之以酒  
以觀其態八證皆備則賢不肖別矣

### 立將

武王問太公曰立將之道柰何太公曰凡國有  
難君避正殿召將而詔之曰社稷安危一在將  
今某國不臣願將軍帥師應之將既受命乃  
命太史卜齋三日之太廟鑽靈龜卜吉日以受



六韜 卷三  
斧鉞君入廟門西面而立將入廟門北面而立  
君親操鉞持首授將其柄曰從此上至天者將  
軍制之復操斧持柄授其將以刃曰從此下至  
淵者將軍制之見其虛則進見其實則止勿以  
三軍爲衆而輕敵勿以受命爲重而必死勿以  
身貴而賤人勿以獨見而違衆勿以辨說而必  
然士未坐勿坐士未食勿食寒暑必同如此士  
必盡死力將以受命拜而報君曰臣問國不

可從外治軍不可從中御二心不可以事君疑  
志不可以應敵臣既受命專斧鉞之威臣不敢  
生還願君亦垂一言之命於臣君不許臣臣不  
敢將君許之乃辭而行軍中之事不聞君命皆  
由將出敵決戰無有二心若此則無天於上  
無地於下無敵於前無君於後是故智者爲之  
謀勇者爲之鬪氣厲青雲疾若馳騖兵不接刃  
而敵降服戰勝於外功立於內吏遷上賞百姓

六韜 卷三 三十一 萬



懽悅將無咎殃是故風雨時節五穀豐登社稷  
安寧武王曰善哉

### 將威

武王問太公曰將何以爲威何以爲明何以爲  
禁止而令行太公曰將以誅大爲威以賞小爲  
明以罰審爲禁止而令行故殺一人而三軍震  
者殺之賞一人而萬人說者賞之殺貴大賞貴  
小殺及當路貴重之人是刑上極也賞及牛豎  
馬洗廐養之徒是賞下通也刑上極賞下通是  
將威之所行也

### 勵軍

武王問太公曰吾欲三軍之衆攻城爭先登野  
戰爭先赴聞金聲而怒聞鼓聲而喜爲之柰何  
太公曰將有三勝武王曰敢問其自太公曰將  
冬不服裘夏不操扇雨不張蓋名曰禮將將不  
身服禮無以知士卒之寒暑出隘塞犯塗泥將



必先下步名曰力將將不身服力無以知士卒之勞苦軍皆定次將乃就舍炊者皆熟將乃就食軍不舉火將亦不舉名曰止欲將將不身服止欲無以知士卒之饑飽將與士卒共寒暑勞苦饑飽故三軍之衆聞鼓聲則喜聞金聲則怒高城深池矢石繫下士爭先登白刃始合士爭先赴士非好死而樂傷也爲其將知寒暑饑飽之審而見寒暑之明也

### 陰符

武王問太公曰引兵深入諸侯之地三軍卒有緩急或利或害吾將以近通遠從中應外以給三軍之用爲之柰何太公曰主與將有陰符凡八等有六勝克敵之符長一尺破軍擒將之符長九寸降城得邑之符長八寸却敵報遠之符長七寸警衆堅守之符長六寸請糧益兵之符長五寸敗軍亡將之符長四寸失利亡士之符



長三寸諸奉使稽留符若符事聞泄者皆誅之  
八符者主將祕聞所以陰通言語不泄中外相  
知之術敵雖聖智莫之所識武王曰善哉

陰書

武王問太公曰引兵深入諸侯之地主將欲合  
兵行無窮之變圖不測之利其事煩多符不能  
明相去遼遠言語不通爲之柰何太公曰諸有  
陰事大慮當用書不用符主以書遺將將以書

問主書皆一合而再離三發而一知再離者分  
書爲三部三發而一知者言三人人操一分相  
參而不使知情也此謂陰書敵雖聖智莫之能  
識武王曰善哉

軍勢

武王問太公曰攻伐之道柰何太公曰勢因敵  
家之動變生於兩陳之間竒正發於無窮之源  
故至事不語用兵不言且事之至者其言不足



聽也兵之用者其狀不足見也倏而往忽而來能獨專而不制者兵也聞則議見則圖知則困辨則危故善戰者不待張軍善除患者理於未生勝敵者勝於無形上戰無與戰故爭勝於白刃之前者非良將也設備於已失之後者非上聖也智與衆同非國師也技與衆同非國工也事莫大於必克用莫大於玄默動莫大於不意謀莫善於不識夫先勝者先見弱於敵而後戰

者也故士半而功倍焉聖人徵於天地之動孰知其紀循陰陽之道而從其候當天地盈縮因以爲常物有死生因天地之形故曰未見形而戰雖衆必敗善戰者居之不撓見勝則起不勝則止故曰無恐懼無猶豫用兵之害猶豫最大三軍之災莫過狐疑善戰者見利不尖遇時不疑失利後時反受其殃故智者從之而不釋巧者一決而不猶豫是以疾雷不及掩耳迅電不



及瞑目赴之若驚用之若狂當之者破近之者  
亡孰能禦之夫將有所不言而守者神也有所  
不見而視者明也故知神明之道者野無橫敵  
對無立國武王曰善哉

### 奇兵

武王問太公曰凡用兵之法大要何如太公曰  
古之善戰者非能戰於天上非能戰於地下其  
成與敗皆由神勢得之者昌失之者亡夫兩敵

之間出甲陳兵縱卒亂行者所以爲變也深草  
蒹藋者所以遁逃也溪谷險阻者所以止車禦  
騎也隘塞山林者所以少擊衆也坳澤窈冥者  
所以匿其形也清明無隱者所以戰勇力也疾  
如流矢擊如發機者所以破精微也詭伏設奇  
遠張誑誘者所以破軍擒將也四分五裂者所  
以擊圓破方也因其驚駭者所以一擊十也因  
其勞倦暮舍者所以十擊百也奇技者所以越



深水渡江河也強弩長兵者所以踰水戰也長  
關遠候暴疾繆遁者所以降城服邑也鼓行誼  
者所以行奇謀也大風甚雨者所以搏前擒  
後也僞稱敵使者所以絕糧道也謬號令與敵  
同服者所以備走北也戰必以義者所以勵衆  
勝敵也尊爵重賞者所以勸用命也嚴刑重罰  
者所以進罷怠也一喜一怒一與一奪一文一  
武一徐一疾者所以調和三軍制一臣下也處

高敞者所以警守也保險阻者所以爲固也山  
林茂穢者所以默往來也深溝高壘積糧多者  
所以持久也故曰不知戰攻之策不可以語敵  
不能分移不可以語奇不通治亂不可以語變  
故曰將不仁則三軍不親將不勇則三軍不銳  
將不智則三軍大疑將不明則三軍大傾將不  
精微則三軍失其機將不常戒則三軍失其備  
將不強力則三軍失其職故將者人之司命三



軍與之俱治與之俱亂得賢將者兵強國昌不得賢將者兵弱國亡武王曰善哉

### 五音

武王問太公曰律音之聲可以知三軍之消息勝負之決乎太公曰深哉王之問也夫律管十二其要有五音宮商角徵羽此真正聲也萬代不易五行之神道之常也金木水火土各以其勝攻也古者三皇之世虛無之情以制剛強無

有文字皆由五行五行之道天地自然六甲之分微妙之神其法以天清淨無陰雲風雨夜半遣輕騎往至敵人之壘去九百步外徧持律管當耳大呼驚之有聲應管其來甚微角聲應管當以白虎徵聲應管當以玄武商聲應管當以朱雀羽聲應管當以勾陳五管聲盡不應者宮也當以青龍此五行之符佐勝之徵成敗之機武王曰善哉太公曰微妙之音皆有外候武王



曰何以知之太公曰敵人驚動則聽之聞枹鼓之音者角也見火光者徵也聞金鐵矛戟之音者商也聞人嘯呼之音者羽也寂寞無聞者宮也此五音者聲色之符也

### 兵徵

武王問太公曰吾欲未戰先知敵人之強弱豫見勝負之徵爲之柰何太公曰勝負之徵精神先見明將察之其效在人謹候敵人出入進退

察其動靜言語妖祥士卒所告凡三軍悅懌士卒畏法敬其將命相喜而破敵相陳以勇猛相質以威武此強徵也三軍數驚士卒不齊相恐以敵強相語以不利耳目相屬祆言不止衆口相惑不畏法令不重其將此弱徵也三軍齊整陳勢以固深溝高壘又有大風甚雨之利三軍無故旌旗前指金鐸之聲揚以清鼙鼓之聲宛以鳴此得神明之助大勝之徵也行陣不固旌



旗亂而相遶逆大風甚雨之利士卒恐懼氣絕而不屬戎馬驚奔兵車折軸金鐸之聲下以濁鞀鼓之聲濕以沫此大敗之徵也凡攻城圍邑城之氣色如死灰城可屠城之氣出而北城可克城之氣出而西城可降城之氣出而南城不可拔城之氣出而東城不可攻城之氣出而復入城主逃北城之氣出而覆我軍之上軍必病城之氣出高而無所止用兵長久冗攻城圍邑

農器

過旬不雷不雨必亟去之城必有大輔此所以知可攻而攻不可攻而止武王曰善哉

武王問太公曰天下安定國家無爭戰攻之具可無修乎守禦之備可無設乎太公曰戰攻守禦之具盡於人事耒耜者其行馬蒺藜也馬牛車輿者其營壘蔽櫓也鋤耨之具其矛戟也蓑薛登笠者其甲冑干櫓也鑊鍤斧鋸杵臼其攻



城器也牛馬所以轉輸糧也雞犬其伺候也婦人織紝其旌旗也丈夫平壤其攻城也春鏹草棘其戰車騎也夏耨田疇其戰步兵也秋刈禾薪其糧食儲備也冬實倉廩其堅守也田里相伍其約束符信也里有吏官有長其將帥也里有周垣不得相過其隊分也輸粟取芻其廩庫也春秋治城郭脩溝渠其塹壘也故用兵之具盡於人事也善爲國者取於人事故必使遂其

六畜闢其田野究其處所丈夫治田有畝數婦人織紝有尺度是富國強兵之道也武王曰善

哉



前卷之三終

國家圖書館, NATIONAL CENTRAL LIBRARY, TAIWAN, R.O.C.





六韜

六韜四

虎韜

軍用

武王問太公曰王者舉兵三軍器用攻守之具  
科品衆寡豈有法乎太公曰大哉王之間也夫  
攻守之具各有科品此兵之大威也武王曰願



明倫東趙標校刊





開之太公曰凡用兵之大數將甲士萬人法用  
武衛大扶胥三十六乘材士強弩矛戟爲翼一  
車二十四人推之以八尺車輪車上立旗鼓兵  
法謂之震駭陷堅陣敗強敵武翼大櫓矛戟扶  
胥七十二具材士強弩矛戟爲翼以五尺車輪  
絞車連弩自副陷堅陣敗強敵提翼小櫓扶胥  
一百四十具絞車連弩自副以鹿車輪陷堅陣  
以強敵大黃參連弩大扶胥三十六乘材士強

弩矛戟爲翼飛鳧電影自副飛鳧赤莖白羽以  
銅爲首電影青莖赤羽以鐵爲首晝則以絳縞  
長六尺廣六寸爲光耀夜則以白縞長六尺廣  
六寸爲流星陷堅陣敗步騎大扶胥衝車三十  
六乘螳螂武士共載可以擊縱橫敗強敵輜車  
騎寇一名電車兵法謂之電擊陷堅陣敗步騎  
寇夜來前矛戟扶胥輕車一百六十乘螳螂武  
士三人共載兵法謂之霆擊陷堅陣敗步騎方



首鐵楛維盼重十二斤柄長五尺以上千二百枚一名天楛大柯斧刃長八寸重八斤柄長五尺以上千二百枚一名天鉞方首鐵楛重八斤柄長五尺以上千二百枚一名天楛敗步騎群寇飛鉤長八寸鉤芒長四寸柄長六寸以上千二百枚以投其衆三軍拒守木螳螂劔刃扶胥廣二丈百二十具一名行馬平易地以步兵敗車騎木蒺藜去地二尺五寸百二十具敗步騎

要窮寇遮走北軸旋短衝矛戟扶胥百二十具黃帝所以敗蚩尤氏敗步騎要窮寇遮走北狹路微徑張鐵蒺藜芒高四寸廣八寸長六尺以上千二百具敗走騎突瞋來前促戰白刃接張地羅鋪兩鏃蒺藜參連織女芒間相去二尺萬二千具曠野草中方冑鋌矛千二百具張鋌矛法高一尺五寸敗步騎要窮寇遮走北狹路微徑地陷鐵械鎖參連百二十具敗步騎要窮寇



遮走北壘門拒守矛戟小櫓十二具絞車連弩  
自副三軍拒守天羅虎落鎖連一部廣一丈五  
尺高八尺百二十具虎落劔刃扶胥廣一丈五  
尺高八尺五百一十具渡溝塹飛橋一間廣一  
丈五尺長二丈以上着轉關轆轤八具以環利  
通索張之渡大水飛江廣一丈五尺長二丈以  
上八具以環利通索張之天浮鐵螳螂矩內員  
外徑四尺以上環絡自副三十二具以天浮張

飛江濟大海謂之天潢一名天舡山林野居結  
虎落柴營環利鐵鎖長二丈以上千二百枚環  
利大通索大四寸長四丈以上六百枚環利車  
通索大二寸長四丈以上二百枚環利小徽纜  
長二丈以上萬二千枚天雨蓋重車上板結泉  
鈕鍔廣四尺長四丈以上車一具以鐵杙張之  
伐木天斧重八斤柄長三尺以上三百枚檠鏤  
刃廣六寸柄長五尺以上三百枚銅築固爲垂



長五尺以上三百枚鷹爪方胷鐵把柄長七尺  
以上三百枚方胷鐵又柄長七尺以上三百枚  
方胷兩枝鐵又柄長七尺以上三百枚芟草木  
大鎌柄長七尺以上三百枚大櫓刃重八斤柄  
長六尺三百枚委環鐵杙長三尺以上三百枚  
楸杙大鎚重五斤柄長二尺以上百二十具甲  
士萬人強弩六千戟櫓二千矛楯二千脩治攻  
具砥礪兵器巧手三百人此舉兵用之大數也

武王曰允哉

三陳

武王問太公曰凡用兵爲天陳地陳人陳柰何  
太公曰日月星辰斗柄一左一右一向一背此  
謂天陳丘陵水泉亦有前後右左之利此謂地  
陳用車用馬用文用武此謂人陳武王曰善哉

疾戰

武王問太公曰敵人圍我斷我前後絕我糧道



爲之柰何太公曰此天下之困兵也暴用之則  
勝徐用之則敗如此者爲四武衝陳以武車驍  
騎驚亂其軍而疾擊之可以橫行武王曰若已  
出圍地欲因以爲勝爲之柰何太公曰左軍疾  
左右軍疾右無與敗人爭道中軍迭前迭後敵  
人雖衆其將可走

必出

武王問太公曰引兵深入諸侯之地敵人匹合

而圍我斷我歸道絕我糧食敵人既衆糧食甚  
多險阻又固我欲必出爲之柰何太公曰必出  
之道器械爲寶勇鬪爲首審知敵人空虛之地  
無人之處可以必出將士持玄旗操器械設銜  
枚夜出勇力飛足冒將之士居前平壘爲軍開  
道材士強弩爲伏兵居後弱卒車騎居中陳畢  
徐行慎無驚駭以武衝扶胥前後拒守武翼大  
櫓以備左右敵人若驚勇力冒將之士突擊而



前弱卒車騎以屬其後材士強弩隱伏而處審  
候敵人追我伏兵疾擊其後多其火鼓若從地  
出若從天下三軍勇鬪莫我能禦武王曰前有  
大水廣塹深坑我欲踰渡無舟楫之備敵人屯  
壘限我軍前塞我歸道斥候常戒險塞盡守車  
騎要我前勇士擊我後爲之柰何太公曰大水  
廣塹深坑敵人所不守或能守之其卒必寡若  
此者以飛江轉關與天潢以濟吾軍勇力材士

從我所指衝敵絕陳皆致其死先燔吾輜重燒  
吾糧食明告吏士勇鬪則生不勇則死已出令  
我踵軍設雲火遠候必依草木丘墓險阻敵人  
車騎必不敢遠追長驅因以火爲記先出者至  
火而止爲四武衝陳如此則吾三軍皆精銳勇  
鬪莫我能止武王曰善哉

### 軍畧

武王問太公曰引兵深入諸侯之地遇深溪大



谷險阻之水吾三軍未得畢濟而天暴雨流水  
大至後不得屬於前無舟梁之備又無水草之  
資吾欲畢濟使三軍不稽留爲之柰何太公曰  
凡帥師將衆慮不先設器械不備教不精信士  
卒不習若此不可以爲王者之兵也凡三軍有  
大事莫不習用器械攻城圍邑則有輶輶臨衝  
視城中則有雲梯飛樓三軍行止則有武衝大  
櫓前後拒守絕道遮街則有財士強弩衛其兩  
傍設營壘則有天羅武落行馬疾梨晝則登雲  
梯遠望立五色旌旗夜則設火雲萬炬擊雷鼓  
振鼙鐸吹鳴茄越溝塹則有飛橋轉關轆轤鉏  
鉏濟大水則有天潢飛江逆波上流則有浮海  
絕江三軍用備主將何憂

臨境

武王問太公曰吾欲敵人臨境相拒彼可以來  
我可以往陣皆堅固莫敢先舉我欲往而襲之



彼可以來爲之柰何太公曰分兵三處令我前軍深溝增壘而無出列旌旗擊鞀鼓完爲守備令我後軍多積糧食無使敵人知我意發我銳士潛襲其中擊其不意攻其無備敵人不知我情則止不來矣武王曰敵人知我之情通我之機動則得我事其銳士伏於深草要我隘路擊我便處爲之柰何太公曰令我前軍日出挑戰以勞其意令我老弱曳柴揚塵鼓吹而往來

出其左或出其右去敵無過百步其將必勞其卒必駭如此則敵人不敢來吾往者不止或襲其內或擊其外三軍疾戰敵人必敗

### 動靜

武王問太公曰引兵深入諸侯之地與敵之軍相當兩陳相望衆寡強弱相等未敢先舉吾欲令敵人將帥恐懼士卒心傷行陳不固後陳欲走前陳數顧鼓譟而乘之敵人遂走爲之柰何



太公曰如此者發我兵去寇十里而伏其兩傍車騎百里而越其前後多其旌旗益其金鼓戰合鼓譟而俱起敵將必恐其軍驚駭衆寡不相救貴賤不相待敵人必敗武王曰敵之地勢不可以伏兩傍車騎又無以越其前後敵知我慮先施其備我士卒心傷將帥恐懼戰則不勝爲之柰何太公曰誠哉王之問也如此者先戰五日發我遠候往視其動靜審候其來設伏而待之必於死地與敵相避遠我旌旗踈我行陳必奔其前與敵相當戰合而走擊至三里而還伏兵乃起或陷其兩傍或擊其前後三軍疾戰敵人必走武王曰善哉

### 金鼓

武王問太公曰引兵深入諸侯之地與敵相當而天大寒甚暑日夜霖雨旬日不止溝壘悉壞隘塞不止斥候懈怠士卒不戒敵人夜來三軍



無備上下惑亂爲之柰何太公曰凡三軍以戒爲固以怠爲敗令我壘上誰何不絕人執旌旗外內相望以號相命勿令乏音而皆外向三千人爲一屯誠而約之各慎其處敵人皆來視我軍之警戒至而必還力盡氣怠發我銳士隨而擊之武王曰敵人知我隨之而伏其銳士佯北不止過伏而還或擊我前或擊我後或薄我壘吾三軍大恐擾亂失次離其處所爲之柰何太

公曰分爲三隊隨而追之勿越其伏三隊俱至或擊其前後或陷其兩傍明號審令疾擊而前敵人必敗

### 絕道

武王問太公曰引兵深入諸侯之地與敵相守敵人絕我糧道又越我前後吾欲戰則不可勝欲守則不可久爲之柰何太公曰凡深入敵人之地必察地之形勢務求利便依山林險阻水



泉林木而爲之固謹守關梁又知城邑丘墓地  
形之利如是則我軍堅固敵人不能絕我糧道  
又不能越我前後武王曰吾三軍過大林廣澤  
平易之地吾候望誤失卒與敵人相薄以戰則  
不勝以守則不固敵人翼我兩傍越我前後三  
軍大恐爲之柰何太公曰凡帥師之法常先發  
遠候去敵二百里審知敵人所在地勢不利則  
以武衝爲壘而前又置兩踵軍於後遠者百里  
近者五十里即其警急前後相救吾三軍常完  
堅必無毀傷武王曰善哉

畧地

武王問太公曰戰勝深入畧其地有大城不可  
下其別軍守險與我相拒我欲攻城圍邑恐其  
別軍卒至而盤我中外相合擊我表裏三軍大  
亂上下恐駭爲之柰何太公曰凡攻城圍邑車  
騎必遠屯衛警戒阻其內外中人絕糧外不得



輸城人恐怖其將必降武王曰中人絕糧外不  
得輸陰爲約誓相與密謀夜出窮寇死戰其車  
騎銳士或衝我內或擊我外士卒迷惑三軍敗  
亂爲之柰何太公曰如此者當分軍爲三軍謹  
視地形而處審知敵人別軍所在及其大城別  
堡爲之置遺缺之道以利其心謹備勿失敵人  
恐懼不入山林即歸大邑走其別軍車騎遠要  
其前勿令遺脫中人以爲先出者得其徑道其

練卒材士必出其老弱獨在車騎深入長驅敵  
人之軍必莫敢至慎勿與戰絕其糧道圍而守  
之必久其日而燔人積聚無壞人宮室冢樹社  
叢勿伐降者勿殺得而勿戮示之以仁義施之  
以厚德令其士民曰辜在一入如此則天下和  
服武王曰善哉

### 火戰

武王問太公曰引兵深入諸侯之地遇深草薈



穢周吾軍前後左右三軍行數百里人馬疲倦  
休止敵人因天燥疾風之利燔吾上風車騎銳  
士堅伏吾後吾三軍恐怖散亂而走爲之柰何  
太公曰若此者則雲梯飛樓遠望左右謹察前  
後見火起即燔吾前而廣延之又燔吾後敵人  
苟至則引軍而却按黑地而堅處敵人之來猶  
在吾後見火起必遠走吾按黑地而處強弩材  
士衛吾左右又燔吾前後若此則敵不能害我

武王曰敵人燔吾左右又燔吾前後煙覆吾軍  
其大兵按黑地而起爲之柰何太公曰若此者  
爲四武衝陳強弩翼吾左右其法無勝亦無負

### 壘虛

武王問太公曰何以知敵壘之虛實自來自去  
太公曰將必上知天道下知地利中知人事登  
高下望以觀敵之變動望其壘即知其虛實望  
其士卒即知其去來武王曰何以知之太公曰



聽其鼓無音鐸無聲望其壘上多飛鳥而不驚  
上無氛氣必知敵詐而爲偶人也敵人卒去不  
遠未定而復反者彼用其士卒太疾也太疾則  
前後不相次不相次則行陳必敗如此者急出  
兵擊之以少擊衆則必敗矣

六篇卷之四終



六韜

六韜五

豹韜

林戰

武王問太公曰引兵深入諸侯之地遇大林與敵分林相拒吾欲以守則固以戰則勝爲之柰何太公曰使吾三軍分爲衝陳使兵所處弓弩

明河東趙標校刊

國家圖書館 NATIONAL CENTRAL LIBRARY, TAIWAN, R.O.C.



爲表戟楯爲裏斬除林木極廣吾道以便戰所  
高置旌旗謹勅三軍而使敵人知吾之情是謂  
林戰林戰之法率吾矛戟相與爲伍林間木踈  
以騎爲輔戰車居前見便則戰不見便則止林  
多險阻必置衝陳以備前後三軍疾戰敵人雖  
衆其將可走更戰更息各按其部是謂林戰之  
紀

### 突戰

武王問太公曰敵人深入長驅侵掠我地驅我  
牛馬其三軍大至薄我城下吾士卒大恐人民  
係累爲敵所搏吾欲以守則固以戰則勝爲之  
柰何太公曰如此者謂之突兵其牛馬必不得  
食士卒絕糧暴擊而前令我遠邑別軍選其銳  
士疾擊其後審其期日必會於晦三軍疾戰敵  
人雖衆其將可虜武王曰敵人分爲三四或戰  
而侵掠我地或止而收我牛馬其大軍未盡至



而使寇薄我城下致吾三軍恐懼爲之柰何太公曰謹候敵人未盡至則設備而待之去城四里而爲壘金鼓旌旗皆列而張別隊爲伏兵令我壘上多積強弩百步一突門門有行馬車騎居外勇力銳士隱伏而處敵人若至使我輕卒合戰而佯走令我城上立旌旗擊鼙鼓完爲守備敵人以我爲守城必薄我城下發吾伏兵以衝其內或擊其外三軍疾戰或擊其前或擊其

後勇者不得鬪輕者不及走名曰突戰敵人雖衆其將必走武王曰善哉

敵強

武王問太公曰引兵深入諸侯之地與敵人衝軍相當敵衆我寡敵強我弱敵人夜來或攻吾左或攻吾右三軍震動吾欲以戰則勝以守則固爲之柰何太公曰如此者謂之震寇利以出戰不可以守選吾材士強弩車騎爲左右疾擊



其前急攻其後或擊其表或擊其裏其卒必亂其將必駭武王曰敵人遠遮我前急攻我後斷我銳兵絕我材士吾內外不得相聞三軍擾亂皆敗而走士卒無鬪志將吏無守心爲之柰何太公曰明哉王之問也當明號審令出我勇銳冒將之士人操炬火二人同鼓必知敵人所在或擊其表裏微號相知令之滅火鼓音皆止中外相應期約皆當三軍疾戰敵必敗亡武王曰

善哉

敵武

武王問太公曰引兵深入諸侯之地卒遇敵人甚衆且武武車驍騎繞我左右吾三軍皆震走不可止爲之柰何太公曰如此者謂之敗兵善者以勝不善者以亡武王曰用之柰何太公曰伏我材士強弩武車驍騎爲之左右常去前後三里敵人逐我發我車騎衝其左右如此則敵



人擾亂吾走者自止武王曰敵人與我車騎相當敵衆我少敵強我弱其來整治精銳吾陳不敢當爲之柰何太公曰選我材士強弩伏於左右車騎堅陳敵人過我伏兵積弩射其左右車騎銳兵疾擊其軍或擊其前或擊其後敵人雖衆其將必走武王曰善哉

### 鳥雲山兵

武王問太公曰引兵深入諸侯之地遇高山盤

石其上亭亭無有草木四面受敵吾三軍恐懼士卒迷惑吾欲以守則固以戰則勝爲之柰何太公曰凡三軍處山之高則爲敵所棲處山之下則爲敵所囚既以被山而處必爲鳥雲之陳鳥雲之陳陰陽皆備或屯其陰或屯其陽處山之陽備山之陰處山之陰備山之陽處山之左備山之右處山之右備山之左敵所能陵兵其表懼道通谷絕以武車高置旌旗謹勅三軍



無使敵人知吾之情是謂山城行列已定士卒已陳法令已行竒正已設各置衝陳於山之表便兵所處乃分車騎爲烏雲之陳三軍疾戰敵人雖衆其將可擒

### 烏雲澤兵

武王問太公曰引兵深入諸侯之地與敵人臨水相拒敵富而衆我貧而寡踰水擊之則不能前欲久其日則糧食少吾居斥鹵之地四旁無

邑又無草木三軍無所掠取牛馬無所芻牧爲之柰何太公曰三軍無備牛馬無食士卒無糧如此者索便詐敵而亟去之設伏兵於後武王曰敵不可得而詐吾士卒迷惑敵人越我前後吾三軍敗而走爲之柰何太公曰求途之道金玉爲主必因敵使精微爲寶武王曰敵人知我伏兵大軍不肯濟別將分隊以踰於水吾三軍大恐爲之柰何太公曰如此者分爲衝陳便兵



所處須其畢出發我伏兵疾擊其後強弩兩傍射其左右車騎分爲烏雲之陳備其前後三軍疾戰敵人見我戰合其大軍必濟水而來發我伏兵疾擊其後車騎衝其左右敵人雖衆其將可走凡用兵之大要當敵臨戰必置衝陳便兵所處然後以車騎分爲烏雲之陳此用兵之奇也所謂烏雲者烏散而雲合變化無窮者也武王曰善哉

### 少衆

武王問太公曰吾欲以少擊衆以弱勝強爲之柰何太公曰以少擊衆者必以日之暮伏於深草要之隘路以弱擊強者必得大國之與鄰國之助武王曰我無深草又無隘路敵人已至不適日暮我無大國之與又無鄰國之助爲之柰何太公曰妄張詐誘以熒惑其將迂其途令過深草遠其路令會日暮前行未渡水後行未及



舍發我伏兵疾擊其左右車騎擾亂其前後敵人雖衆其將可走事大國之君下鄰國之士厚其幣卑其辭如此則得大國之與鄰國之助矣  
武王曰善哉

分險

武王問太公曰引兵深入諸侯之地與敵人相遇於險阨之中吾左山而右水敵右山而左水與我分險相拒吾欲以守則固以戰則勝爲之

柰何太公曰處山之左急備山之右處山之右急備山之左險有大水無舟楫者以天潢濟吾三軍已濟者亟廣吾道以便戰所以武衝爲前後列其強弩令行陳皆固衛道谷口以武衝絕之萬置旌旗是謂軍城凡險戰之法以武衝爲前大櫓爲衛材士強弩翼吾左右三千人爲一屯必置衝陳使兵所處左軍以左右軍以右中軍以中並攻而前已戰者還歸屯所更戰更息



必勝乃已武王曰善哉

六韜卷之五終

國家圖書館, NATIONAL CENTRAL LIBRARY, TAIWAN, R.O.C.



六韜

六韜六

大韜

分合

武王問太公曰王者帥師三軍分爲數處將欲  
期會合戰約誓賞罰爲之柰何太公曰凡用兵  
之法三軍之衆必有分合之變其大將先定戰

明河東趙標校刊

國家圖書館, NATIONAL CENTRAL LIBRARY, TAIWAN, R.O.C.



地戰日然後移檄書與諸將吏期攻城圍邑各  
會其所明告戰日漏刻有時大將設營而陳立  
表轅門清道而待諸將吏至者校其先後先期  
至者賞後期至者斬如此則遠近奔集三軍俱  
至并力合戰

武鋒

武王問太公曰凡用兵之要必有武車驍騎馳  
奔選鋒見可則擊之如何而可擊太公曰夫欲

擊者當審敵人十四變變見則擊之敵人必敗  
武王曰十四變可擊聞乎太公曰敵人新集可  
擊人馬未食可擊天時不順可擊地形未得可  
擊奔走可擊不戒可擊疲勞可擊將離士卒可  
擊涉長路可擊濟水可擊不暇可擊阻難狹路  
可擊亂行可擊心怖可擊

練士

武王問太公曰練士之道柰何太公曰軍中有



大勇敢死樂傷者聚爲一卒名曰冒刃之士有  
銳氣壯勇強暴者聚爲一卒名曰陷陳之士有  
竒表長劍接武齊列者聚爲一卒名曰勇銳之  
士有披距伸鉤強梁多力潰破金鼓絕滅旌旗  
者聚爲一卒名曰勇力之士有踰高絕遠輕卒  
善走者聚爲一卒名曰寇兵之士有王臣失勢  
欲復見功者聚爲一卒名曰死闘之士有死將  
之人子弟欲爲其將報仇者聚爲一卒名曰死

憤之士有貧窮忿怒欲快其志者聚爲一卒名  
曰必死之士有贅媼入虜欲掩迹揚名者聚爲  
一卒名曰勵鈍之士有昏靡免罪之人欲逃其  
恥者聚爲一卒名曰幸用之士有材技無人能  
負重致遠者聚爲一卒名曰待命之士此軍之  
練士不可不察也

教戰

武王問太公曰合三軍之衆欲令士卒服習教







之法一車當步卒八十人八十人當一車一騎  
當步卒八人八人當一騎一車當十騎十騎當  
一車險戰之法一車當步卒四十人四十人當  
一車一騎當步卒四人四人當一騎一車當六  
騎六騎當一車夫車騎者軍之武兵也十乘敗  
千人百乘敗萬人十騎走百人百騎走千人此  
其大數也武王曰車騎之吏數陣法柰何太公  
曰置車之吏數五車一長十車一吏五十車一

率百車一將易戰之法五車爲列相去四十步  
左右十步隊間六十步險戰之法車必循道十  
車爲聚二十車爲屯前後相去二十步左右六  
步隊間三十六步五車一長縱橫相去一里各  
返故道置騎之吏數五騎一長十騎一吏百騎  
一率二百騎一將易戰之法五騎爲列前後相  
去二十步左右四步隊間五十步險戰者前後  
相去十步左右二步隊間二十五步三十騎爲



一屯六十騎爲一輩十騎一吏縱橫相去百步  
周還各復故處武王曰善哉

### 武車士

武王問太公曰選車士柰何太公曰選車士之法取年四十以下長七尺五寸以上走能逐奔馬及馳而乘之前後左右上下週旋能束縛旌旗力能毅八石弩射前後左右皆便習者名曰武車之士不可不厚也

### 武騎士

武王問太公曰選騎士柰何太公曰選騎士之法取年四十已下長七尺五寸已上壯健捷疾超絕倫等能馳騎毅射前後左右周旋進退越溝塹登丘陵冒險阻絕大澤馳強敵亂大衆者名曰武騎士不可不厚也

### 戰車

武王問太公曰戰車柰何太公曰步貴知變動



車貴知地形騎貴知別徑竒道三軍同名而異  
用也凡車之死地有十其勝地有八武王曰十  
死之地柰何太公曰往而無以還者車之死地  
也越絕險阻乘遠行者車之竭地也前易後險  
者車之困地也陷之險阻而難出者車之絕地  
也圯下漸澤黑土黏埴者車之勞地也左險右  
易上陵仰阪者車之逆地也殷草橫畝犯歷深  
澤者車之拂地也車少地易與步不敵者車之

敗地也後有溝瀆左有深水右有峻阪者車之  
壞地也日夜霖雨旬日不止道路潰陷前不能  
進後不能解者車之陷地也此十者車之死地  
也故拙將之所以見擒明將之所以能避也武  
王曰八勝之地柰何太公曰敵之前後行陣未  
定即陷之旌旗擾亂人馬數動即陷之士卒或  
前或後或左或右即陷之陳不堅固士卒前後  
相顧即陷之前往而疑後往而怯即陷之三軍



卒驚且薄而起即陷之戰於易地暮不能解即陷之遠行而暮舍三軍恐懼即陷之此八者車之勝地也將明於十害八勝敵雖圍周千乘萬騎前驅旁馳萬戰必勝武王曰善哉

### 戰騎

武王問太公曰戰騎柰何太公曰騎有十勝九敗武王曰十勝柰何太公曰敵人初至行陳未定前後不屬陷其前騎擊其左右敵人必走敵

人行陳整齊堅固士卒欲鬪吾騎翼而勿去或馳而往或馳而來其疾如風其暴如雷白晝如昏數更旌旗變易衣服其軍可克敵人行陣不固士卒不鬪薄其前後獵其左右翼而擊之敵人必懼敵人暮欲歸舍三軍恐駭翼其兩旁疾擊其後薄其壘口無使得入敵人必敗敵人無險阻保固深入長驅絕其糧道敵人必饑地平而易四面見敵車騎陷之敵人必亂敵人奔走



士卒散亂或翼其兩旁或掩其前後其將可擒  
敵人暮返其兵甚衆其行陣必亂令我騎士十  
而爲隊百而爲屯車五而爲聚十而爲群多設  
旌旗雜以強弩或擊其兩旁或絕其前後敵將  
可虜此騎之十勝也武王曰九敗柰何太公曰  
凡以騎陷敵而不能破陣敵人佯走以車騎返  
擊我後此騎之敗地也追北踰險長驅不止敵  
人伏我兩旁又絕我後此騎之圍地也往而無

以返入而無以出是謂陷於天井頓於地穴此  
騎之死地也所從入者隘所從出者遠彼弱可  
以擊我強彼寡可以擊我衆此騎之沒地也大  
澗深谷翳茂材木此騎之竭地也左右有水前  
有大阜後有高山三軍戰於兩水間敵居表裏  
此騎之艱地也敵人絕我糧道往而無以還此  
騎之困地也汙下沮澤進退漸洳此騎之患地  
也左有深溝右有坑阜高下如平地進退誘敵



此騎之陷地也此九者騎之死地也明將之所  
以遠避闇將之所以陷敗也

### 戰步

武王問太公曰步兵車騎戰柰何太公曰步兵  
與車騎戰者必依丘陵險阻長兵強弩居前短  
兵弱弩居後更發更止敵居之騎雖衆而至堅  
陣疾戰材士強弩以備我後武王曰吾無丘陵  
又無險阻敵人之至既衆且武車騎翼我兩旁

獵我前後吾三軍恐怖亂敗而走爲之柰何太  
公曰令我士卒爲行馬木蒺藜置牛馬隊伍爲  
四武衝陣望敵車騎將來均置蒺藜掘地匝後  
廣深五尺名曰命龍人噪行馬進步闌車以爲  
壘推而前後立而爲屯材士強弩備我左右然  
後令我三軍皆疾戰而必解武王曰善哉



翰卷之六終

刻三代遺書跋

古者竹書紀年及考工檀子六韜  
穆傳周書凡六種其見於域中者  
各有成書而或散或逸觀者有遺  
憾焉

侍御趙公出按畿南東集成部檄  
下天雄俾授諸梓彙題曰三代遺  
書云維時



公暨

監司陳公業次第序之矣仍謂相  
叨居守命序諸末簡余自顧不文  
何能為役竊惟學者載籍極博必  
考信於六經故黃虞而上易書契  
以代結繩尚矣然墳典丘索文不  
雅馴薦紳先生難言之三代以下  
秦灰魯壁放失頗多學者往往師

心創製勒成一家言藉以雅長百  
世即賴有表章誼辟而中之疑以  
傳疑者不可一二記矣迨至於今  
累朝熙洽文治休明碩士之炫竒者  
類多馳騫百家浸淫二氏甚且弁  
髦經史糠粃傳註日入於浮靡而  
不自知是何異於逐狂瀾而已砥  
柱者耶惟是六書旨遠詞微渾沌



不鑿譬則太羹玄酒商鼎周彝冲  
然示人以澹木然示人以樸而天  
下之至味至文胥此焉出信乎其  
為三代之所遺諒非後人之能偽  
為者

侍御公中秘讀書直探無始乃茲  
於觀風之暇切有志於三代之英  
必欲舉遺編而垂不朽毋抑感於

風會之易流而超然有太玄彝鼎  
之思乎嗟乎岐陽斷石未央片瓦  
識者猶然珎之為其可以存周而  
寓漢也矧是書之包綜皇穆摠括  
王猷真可與天壤俱敝者倘博古  
君子試一取而三復之其於追遐  
邈之芳踪邈邈初之懿訓不庶幾  
乎且暮遇之哉余得侍



侍御公宇下習公於激揚貞肅間  
仰窺其反朴還淳之念輒為識其  
大都如此

萬曆甲午菊月

賜進士出身直隸大名府知府楚沅  
塗時相謹跋

